

Media Title : Harian Metro
Headline : JANGAN TEKAN KALAU SAYANG DUIT!
Date : 21 March 2024
Section : Lokal
Page : 2



"Kami mengesan beberapa taktik oleh sindiket penipuan yang menggunakan modus operandi ini seperti menghantar pautan mengandungi fail apk (android package kit). Mana-mana individu yang memuat turun fail berkenaan akan mengakibatkan telefon milik mereka digodam"

JANGAN TEKAN KALAU SAYANG DUIT!

Pautan di media sosial antara taktik scammer umpan mangsa

Oleh Nurul Hidayah
Bahaudin
nurul.hidayah@hmetro.com

Kuala Lumpur

Penggunaan telefon pintar dan peralihan kepada dunia digital dalam urusan seharian menyebabkan penggunaan pautan menjadi satu kelaziman.

Masyarakat didedahkan dan dibiasakan dengan penggunaan pautan termasuk untuk berkongsi artikel berita, maklumat, penghantaran kad ucapan dan pautan iklan.

Kebiasaan ini menjadikan pautan sebagai satu perkara yang dilihat tidak berbahaya serta boleh dipercayai oleh kebanyakan pihak.

Pengarah Jabatan Siasatan Jenayah Komersial Datuk Seri Ramli Mohamed Yoosuf berkata, perkara itu



RAMLI

diambil kesempatan oleh sindiket penipuan untuk memperdayakan mangsa.

"Kami mengesan beberapa taktik oleh sindiket penipuan yang menggunakan modus operandi ini seperti menghantar pautan mengandungi fail apk (android package kit).

"Mana-mana individu yang memuat turun fail berkenaan akan mengakibatkan telefon milik mereka

digodam," katanya kepada Harian Metro, baru-baru ini.

Selain itu, katanya, sindiket penipuan juga akan menghantar pautan yang sekiranya ditekan akan membawa mangsa kepada laman sesawang perbankan palsu.

"Apabila perkara itu berlaku, ia akan menyebabkan mangsa secara tidak sengaja memberikan maklumat nama pengguna dan kata laluan perbankan dalam talian.

"Sindiket itu juga ada menghantar pautan yang jika ditekan akan memperdayakan mangsa untuk memberikan nombor kod pengesahan transaksi (TAC).

"Tindakan itu akan mengakibatkan wang milik mangsa dipindahkan atau akaun media sosial mereka seperti WhatsApp serta Telegram digodam," katanya.

Beliau berkata, operasi

sindiket penipuan yang menghantar pautan kepada mangsa secara rawak tidak hanya terhad dalam tempoh masa tertentu.

Katanya, mereka bijak memanipulasi keadaan semasa dan situasi yang sedang berlaku di dalam negara.

"Contohnya tatkala kerajaan mengumumkan pemberian bantuan STR (Sumbangan Tunai Rahmah), sindiket penipuan ini juga akan menghantar mesej melalui WhatsApp atau Telegram.

"Mesej yang dihantar itu akan disertai dengan pautan kononnya untuk tujuan permohonan bantuan berkenaan.

"Namun hakikatnya, 'borang' permohonan yang disertakan itu adalah bertujuan untuk mendapatkan butiran peribadi dan maklumat perbankan milik mangsa," katanya.



“Ramai masyarakat kita yang suka menggunakan media sosial serta Internet untuk mencari maklumat dan apabila tertarik dengan informasi itu, mereka tidak teragak-agak untuk terus menekan pautan”

KES 1

Pada 2 Februari lalu, satu laporan polis diterima di Menggatal, Sabah mengenai kehilangan wang daripada akaun bank milik seorang peniaga.

Seminggu sebelum kejadian, pengadu yang juga lelaki berusia 35 tahun menerima pautan di telefon bimbitnya.

Selepas menekan pautan itu, telefonnya terus terpadam dan pengadu menda-

pati skrin telefonnya kerap bergerak-gerak dipercayai akibat digodam.

Pengadu juga mendapati wang dalam akaun simpanannya, e-wallet Facebook, Tiktok dan akaun Google Finance sudah hilang dengan kerugian dialami berjumlah RM211,955.

Kes disiasat mengikut Seksyen 420 Kanun Keseksaan.

KES 2

Pada 16 Februari lalu, satu

laporan polis diterima di Sentul, Kuala Lumpur berkaitan pengurangan sejumlah wang dari akaun bank milik seorang pegawai sumber manusia.

Menurut pengadu yang juga lelaki berusia 26 tahun, dia terlihat iklan di sebuah laman sesawang memaparkan koleksi komik secara dalam talian.

Untuk mendapatkan akses membaca komik itu, pengadu diminta untuk menekan pautan yang dihantar kepadanya.

Selepas menekan pautan itu, pengadu diminta untuk memasukkan beberapa maklumat kononnya sebagai keperluan melanggan bahan bacaan berkenaan.

Sebaik memasukkan maklumat, pengadu mendapati 29 transaksi pemindahan wang dibuat keluar dari akaun bank miliknya.

Kerugian keseluruhan dialami pengadu adalah RM154,000 dan kes disiasat mengikut Seksyen 4(1) Akta Jenayah Komputer 1997.